



GRADUAN cemerlang Khairani Hamid (kiri), Norhamiza Jaafar, Isma Suhaila, Siti Noor Ahmad (pingat emas) Noorul Izzah (pingat perak), Nazarinah Harun, Nazeerah Sheikh Alwi dan Sayuti Abdullah pada majlis Konvokesyen Insaniah Ke-5 di Alor Setar, semalam.

# Graduan pengajian Islam jangan statik

A LOR SETAR 20 Okt. — Graduan pengajian Islam diseru supaya tidak bersikap statik sebaliknya menguasai pelbagai bidang ilmu terkini agar mampu bersaing dengan graduan lain.

Sultan Kedah bertitah, graduan pengajian Islam perlu mempunyai pengetahuan serta kemahiran seperti dalam bidang teknologi maklumat dan komunikasi (ICT) kerana ia dapat meningkatkan tahap kemahiran sedia ada.

Kemahiran seumpama itu tegas baginda, amat penting bagi membolehkan golongan berpendidikan agama menyesuaikan

diri dengan fenomena perubahan teknologi semasa.

"Kemahiran di dalam bidang ICT adalah penting disebabkan aplikasi penggunaannya sangat meluas sama ada dalam perniagaan mahu pun kehidupan sehari-hari dalam persekitaran ekonomi global," titahnya.

Baginda bertitah demikian sempena Majlis Konvokesyen kali Kelima Institut Agama Islam Negeri Kedah (Insaniah) di Dewan Seri Negeri, Wisma Darulaman di sini, hari ini.

Bagi meningkatkan lagi taraf kecemerlangan akademik, Sultan Kedah turut menyarankan agar

pihak Insaniah memperluaskan kerjasama dengan universiti dalam dan luar negara.

"Beta percaya jika usaha ini digabungkan, graduan Insaniah mampu menjadi tenaga pengajar yang baik kerana mereka telah pun mempunyai ilmu yang mendalam mengenai ilmu-ilmu Islam.

"Ini secara tidak langsung membolehkan mereka menyebarkan ajaran Islam dengan baik kepada para pelajar dan masyarakat," titah baginda.

Sultan Kedah juga mahu para tenaga pengajar mencari serta meneroka bidang-bidang keilmuan terkini agar

mampu melahirkan pelajar yang lebih berkualiti dan berdaya saing.

Selain itu, baginda menegaskan, graduan pengajian Islam tidak seharusnya hanya tertumpu kepada kerjaya masing-masing tetapi perlu memainkan peranan yang penting melalui pembabitan diri mereka dengan aktiviti kemasyarakatan.

Ini kerana titah baginda, kematangan seseorang mahasiswa Islam adalah bergantung kepada sejauh mana mereka dapat membaca, memerhati dan mengkaji keadaan yang berlaku di persekitaran mereka lantas menterjemahkan ilmu yang dipelajari dengan teliti dalam masyarakat.